

1241.1

10

經脈圖考

序

良醫用藥如良將用兵醫不知人身經絡脉穴猶將不知天下山川形勢也陳子壽田經脉圖考蓋仿讀史方輿紀要而作誠能自攄一幟惜黎簡堂中丞黔中刊板已佚蒙游渝城獲舊本重刻之使操活人術者皆得嚮導可應指而奏膚功較之紙上空談似有寔用也時

光緒甲午歲中秋日浙人朱熙小樵甫識

客秋在成都晤譚晴峰大令知原本各圖皆其手繪頗費經

營爲附載於此大令名鍾嶽楚南人又記

序

陸敬輿有活國活人之稱
范希文有良相良醫之慕
古君子以仁存心大用之
則為良相活國小用之則

為良醫活人若取良醫之
術表而彰之以公諸世斯
又良相活國之心分而用
之活人也我姑丈陳公壽
田先生天姿英邁隱於岐

黃每視人病百不失一晚
年憫醫學之逐末而弃本
也爰纂經脈圖考四編一
骨一絡辨正詳明表裏孔
穴朗若列眉後有學者不

難循是而叅妙奧於戲先
生歿垂四十餘年景其術
者稱之頌之習其業者宗
之仰之獨惜是書未克遽
行於世耳丁丑春仲姻家

子陳壽焜遊黔篋中適攜
是編黎簡堂中丞見而悅
之捐廉百金命焜付梓閱
今夏而工竣書來屬予為
之序予維中丞奉

天

天子命巡撫一方其所以活
黔之民者吾不得周知第
即疇昔所學決之蓋駸駸
乎有古相臣風焉異時入
叅密勿調和中外燮理陰

陽杜中丞必有措之裕如
者今且於公餘之暇留心
方術鋟善本而惠生靈是
真能以陸范之身心陸范
之心也夫相之良者非徒

諳刑名精法律之謂其謂
殫格致誠正之業馴至脩
庶治平財成輔相俾無一
民一物不得其所夫而后
為有本之學即醫何獨不

然近世醫師大都據撫古
方牘識藥性出而操斯人
生歿之權苟且耳僥倖耳
茲編行而后天下習斯術
者知以靈素為根本由是

辨腠理考脈絡通神入聖
途徑在斯則所全活不可
勝計其為功德詎在良相
下哉噫微先生是書不足
副中丞濟世之忱微中丞

是舉又烏能成先生濟世
之美予故兩嘉之而亟為
之序以誌其巔末於此
光緒四年歲在戊寅仲秋
月雲牧馬傳卿譔



凡例

一經脈爲醫學之首務而內景爲尤切何者洞垣窺藏之技世不再覩欲窺其藏探其府必藉圖摸索故書以內景賦居前而圖居後兼且考定差訛合其經旨使學者熟讀其賦繼玩其圖然後深求乎靈素之藏象陰陽豈不彰明較著毫髮無遺也哉

一銅人骨度經脈氣穴前賢已有圖而言之者惜乎其略而不詳惟介賓暨我

朝

御定醫宗金鑑悉而言之又皆散在鍼刺門而學者以鍼刺爲失
傳多置而不察不知百病之生也始於皮膚傳舍於絡傳舍
於經傳舍於輸傳舍於伏衝之脈經曰治病必求其本者十
二經脈也十二經脈又本之於軀壳腔子軀壳腔子又皮有
分部脈有經紀筋有結絡骨有度量其所生病各異別其分
部左右上下陰陽所在而病之終始得矣何可置而不察哉
今頗深思研慮考正營行次序穴屬尺寸起止彙爲四卷以